

Powšitkowne WOZJEWJENJA

njedźelu, 5. junija 2016

Za putnikowanje do Krupki so přizjewić

Młodostni wot 16 lět su přeprošeni, wot njedzele, 3. julija, do Krupki putnikować. Woni nawróća so pjatk, 8. julija. Přizjewić měli so zajimcy hač do tuteje njedzele, 5. junija, w Chrósćicach na farje, telefonowe čisło (03 57 96) 80 400. Po tym so přizjewjenja hižo njeprějimuja. Putnicy zetkaja so tutu njedźelu, 5. junija, po nyšporje w Chrósćicach na farje, štož je za wšitkich nowačkow winowatosć. Nyšpor započnje so w 14 hodź. Putniska Boža mša w Krupce budže srjedu, 6. julija, w 10 hodź.

Nyšpor při pomniku swjateju Cyrila a Metoda

Towarstwo Cyrila a Metoda přeprošuje wšitke swójby, młodych kaž staršich ludźi, zo bychu so po putniskim puću pěši, z kolesom abo awtom njedźelu, 12. junija, k pomnikej swjateju Cyrila a Metoda pola Stróžišća podali. W 16 hodź. budže tam nyšpor. Přizamknje so wěcywustojne předstajenje krajiny dokoławokoło. Mały přikus budže spřihotowany.

Wulět samostejacych do Lipska

Samostejacy ze serbskich wosadow změja wutoru, 14. junija, swój lětuši zhromadny wulět z busom, kotryž powjedže do Lipska. Zajimcy njech so hač do pónđzele, 6. junija, w redakciji Katolskeho Posoła přizjewja, telefonowe čisło (0 35 91) 55 02 12. Časy wotjězda busa z jednotliwych wsow so njedźelu do wulěta wozjewja.

Jubilejny koncert zhromadženych chórow z Hornjeje, srjedźneje a Delnjeje Łužicy

Składnostnje 25. róčnicy znowazaloženja Zwjazka serbskich spěwarskich towarstwow z.t. (ZSST) wuhotuja chóry z Hornjeje, srjedźneje a Delnjeje Łužicy tutu njedźelu, 5. junija, w 17 hodź. jubilejny koncert w Budyskim Němsko-Serbskim ludowym dźiwadle. Něhdže 200 spěwarkow a spěwarjow zanjese w swoim programje sep najrjeńšich serbskich spěwow, kotrež zaklinča w tradicionelnym, ale tež w tróšku modernišim šaće. Cyłkowny nawod změje předsyda ZSST Pětr Cyž. Na koncerće zaklinči přeni raz nowy medley z jeho pjera. Předsydstwo ZSST wšitkich lubowarjow chóroweho spěwa wutrobnje přeprošuje.

Duchowna hudźba

Mišterske synagogalne twórby zanjese Lipšćanski synagogalny chór tutu njedźelu, 5. junija, we 18.00 hodź. w rjedže Duchowna hudźba w Budyskej tachantskej cyrkwi. Wšityc su wutrobnje přeprošeni. Zastup je darmotny.

Ministrantska kopańca

Na koparski turněr su ministranća ze serbskich wosadow přeprošeni. Tutón wotměje so sobotu, 18. junija, w Pěskecach. Započatk budže w 9.00 hodź. z Božej mšu we wjesnej cyrkwiće.

Projektowy chór na putnikowanju džěci

Na lětušim putnikowanju džěci Drježdžansko-Mišnjanskeho biskopstwa srjedu, 29. junija, do Róžanta wobrubu mjez druhim projektowy chór serbskich džěci Božu mšu. Zajimowane džěci su wutrobnje k sobuspěwanju přeprošene. Nadrobniše informacije su na plakatach we wosadach podate.

Oratorij „Wětrnik a časy“ znowa zaklinči

Po prapremjerje w lěće 2006 zaklinči oratorij „Wětrnik a časy“ Měrcina Weclicha sobotu, 11. junija, w 17.00 hodž. w Chróšćanskej „Jednoće“ znowa. Twórbu předstaja chór 1. serbskeje kulturneje brigady, Malte-Rogacki-band a orchester Serbskeho ludoweho ansambla pod wumělskim nawodom Friedemanna Böhmy. Po tym zo bu nazymu 2015 nowa CD oratorija nahrawana, so wona nětko z koncertom prezentuje. Wšitcy su wutrobnje přeprošeni.

Atraktiwne džěło w Domje swjateho Jana

Při nowym poskitku spěchowanja duchownje zbrašenych pyta Dom swjateho Jana w Smječkecach fachowe mocy předewšem z kwalifikaciju ergoterapeuta, hladarja a kublarja w hojerni (Heilerziehungspfleger) a podobne. Džělowe městna maja so lětsa w awgusće a septembrje wobsadzić. Džělowy čas je mjez 8.00 a 17.00 hodž. Swoje pisomne požadanje njech pósćelu zajimowani na: CSW – Křescansko-socialny skutk, Janska kupjel 1, 01920 Smječkecy.

Kolesujo putnikować

K putniskemu tydženjej na kole přeprošuje Smochčanski Dom biskopa Bena wot 7. do 14. awgusta. Hornja Łužica ma mnohe rozdźělne kolesowarske puće, kotrež chcedža w tych dnjach nazhonić. Po puću su putnicy k rozmołwam, rozpominanju, čitanju a dalšemu přeprošeni. Čary powjedu po holi a hatach, po serbskich wsach, hornjołužiskich horach, podłu Łobja a Nysy. Etapy su wob džeń něhdže 40 do 50 kilometrow dołhe. Zajimcy měli so w Smochćicach pod telefonowym čisłom (03 59 35) 2 23 15 přizjewić.